



## XUNTA ELECTORAL DE GALICIA

**Asunto:** Acordo da Xunta Electoral de Galicia, do 16 de febreiro de 2024, polo que se resolve a denuncia da representante xeral do Partido Popular ao Alcalde de Caldas de Reis, por unha posible infracción do artigo 50 da LOREX.

A Xunta Electoral de Galicia, á vista dos seguintes

### Antecedentes

1. O 14 de febreiro de 2024, a representante xeral do Partido Popular presenta escrito (RE 504/2024), no que formaliza denuncia contra o Alcalde de Caldas de Reis D. Juan Manuel Rey Rey, por unha posible infracción do artigo 50 da Lei orgánica 5/1985, do 19 de xuño, do réxime electoral xeral (LOREX), derivada da publicación dun boletín informativo con contido electoralista, ao respecto da cal efectúa, entre outras, as seguintes consideracións:

*“...O Concello de Caldas de Reis está repartindo un boletín “informativo” con contido claramente electoralista no que critica de forma subxectiva e partidista a actuación da Xunta de Galicia no relativo á construción dun centro de saúde, obviando a responsabilidade do Concello na tardanza para poñer á disposición da Xunta de Galicia os terreos e atribuíndolla ao goberno autonómico.*

*As manifestacións que contén o boletín non respectan o principio de obxectividade e neutralidade dos poderes públicos no proceso electoral e pretenden a captación de sufraxios para a formación política do PSdeG-PSOE á que pertence o alcalde.*

*A distribución deses folletos ten como finalidade facer crer que a Xunta de Galicia, e polo tanto, o Partido Popular, que a goberna, é a responsable da demora da construción dun centro de saúde e así condicionar e influír o sentido do voto, intentando que os electores non voten ao Partido Popular, senón ao PSdeG-PSOE...”*

2. O 14 de febreiro de 2024, logo da reunión da Xunta Electoral de Galicia, trasladóuselle ao Alcalde de Caldas de Reis copia da denuncia (RS 1345/2024), extremo que se comunicou á representante xeral do Partido Popular (RS 1346/2024).

3. O 15 de febreiro de 2024 o Alcalde de Caldas de Reis formulou alegacións (RE 517/2024), efectuando, entre outras afirmacións, as seguintes:

*“...Trátase de unha folla informativa de un asunto do Pleno da Corporación con data 25 de xaneiro de 2024 e aprobado por unanimidade tal e como indica o boletín, polo tanto é apartidario...Recopila feitos históricos documentados, polo tanto é veraz...Non é partidario e repárteo o servizo de Correos. Non se pide o voto nin explicitamente*



## XUNTA ELECTORAL DE GALICIA

nin implicitamente. Insisto en que é un acto informativa dun suceso acaecido do 25 de xaneiro de 2024, do que quero dar conta ós veciños...Precisamente antes do seu reparto, o servizo de Correos solicitou unha copia do boletín para que a súa asesoría xurídica confirmase que se cumpría coas normas establecidas para o reparto...”

### Fundamentos Xurídicos

**Primeiro.** O artigo 50 da Lei orgánica 5/85, do 19 de xuño, do réxime electoral xeral (LOREX), prohibe expresamente no seu apartado 2 durante o período electoral *“calquera acto organizado ou financiado, directa ou indirectamente, polo poderes públicos que conteña alusións ás realizacións ou aos logros obtidos”*.

**Segundo.** Na Instrución 2/2011, do 24 de marzo, da Xunta Electoral Central, sobre a interpretación do artigo 50 da LOREX, en relación ao obxecto e aos límites das campañas institucionais e dos actos de inauguración realizados polos poderes públicos en período electoral, inclúe entre as accións institucionais permitidas, *“as campañas informativas que resulten imprescindibles para a salvagarda do interese público ou para o correcto desenvolvemento dos servizos públicos. Nestes casos o envío de cartas ou mensaxes aos interesados ou a inserción de anuncios en espazos ou lugares públicos ou en medios de comunicación, deberá limitarse estritamente a proporcionar información de interese xeral sobre a conclusión dunha obra pública, a posta en marcha ou o funcionamento dun servizo público, sen que poida conter connotacións electoralistas nin alusións ás realizacións ou logros obtidos polos poderes públicos afectados”* [apartado cuarto punto b) e derradeiro parágrafo].

En actos financiados polos poderes públicos non se poderán realizar actuacións que teñan contido electoralista ou se empreguen como campaña de realizacións ou logros obtidos, resultando improcedente polo tanto, que as autoridades ou funcionarios realicen actos ou declaracións nese sentido (Ac. XEC do 8 de xuño de 2016, Ac. XEC do 14 de abril de 2011, Ac. XEC do 7 de abril de 2011).

**Terceiro.** A Xunta Electoral Central ten declarado reiteradamente que as administracións públicas no período electoral poden continuar co exercicio das competencias que legalmente teñen atribuídas: *«El artículo 50.2 de LOREG no prohíbe que durante los períodos electorales las administraciones públicas puedan ejercer las potestades administrativas que tengan legalmente atribuidas»* (Ac. XEC do 4 de marzo de 2020).

Polo tanto, o inicio do período electoral *“no interrumpe aquellas actuaciones de los poderes públicos que resulten necesarias para la salvagarda del interés público o para el correcto desarrollo de los servicios públicos”* (Ac. XEC do 10 de maio de 2011), e tampouco impide a información sempre que se limite estritamente a proporcionar aquela que sexa de interese



## XUNTA ELECTORAL DE GALICIA

xeral (Ac. XEC do 14 de abril de 2011) ou que sexa útil, carente de valoracións electoralistas e enmarcada dentro dunha campaña informativa específica (Ac. XEC do 16 de maio de 2019).

No Boletín Informativo do concello de Caldas de Reis referido na denuncia, infórmase de xestións previas e antecedentes administrativos relacionados coa construción dun centro sanitario nese municipio, da súa ubicación e dos servizos que se prestarán nel.

Nesa publicación repartida á vecindade polo servizo de Correos, segundo refire o alcalde, contense información de interese xeral para a cidadanía acerca da construción dunha obra pública. Non se aprecian nela datos que poidan poñerse en relación cunha campaña de logros que denuncia a representante do Partido Popular.

En consecuencia, non apreciándose connotacións electoralistas nin campaña de logros que poidan incardinarse na prohibición que establece o artigo 50.2 da LOREX,

### **Acorda**

A desestimación da denuncia e o seu arquivo.

En execución do presente acordo, e para o cumprimento do disposto no art. 21.2 LOREX, desenvolvido pola Instrución da Xunta Electoral Central 11/2007, do 27 de setembro, comunícolle que contra el poderá interpoñer recurso de alzada ante a Xunta Electoral Central, que deberá presentarse ante esta Xunta Electoral de Galicia, para o seu informe, antes das 18:00 horas do próximo día 17 de febreiro de 2024.

O recurso poderá presentarse por correo electrónico no seguinte enderezo: [xunta.electoral.galicia@parlamentodegalicia.gal](mailto:xunta.electoral.galicia@parlamentodegalicia.gal)